

PWYLLGOR SGRIWTINI PARTNERIAETH AC ADFYWIO

Cofnodion y cyfarfod a gynhaliwyd ar 14 Ionawr 2015

- YN BRESENNOL:** Y Cyng. Derlwyn Rees Hughes (Cadeirydd)
Y Cyng. Alun Wyn Mummery (Is-Gadeirydd)
- Y Cynghorwyr John Griffith, R LI Jones, Richard Owain Jones a Dylan Rees
- WRTH LAW:** Cyfarwyddwr Corfforaethol (Cymuned)
Pennaeth Gwasanaethau Plant (ar gyfer eitemau 5 a 6)
Pennaeth Gwasanaethau Oedolion (ar gyfer eitemau 5 a 6)
Swyddog Sgriwtini (GR)
Swyddog Pwyllgor (MEH)
- YMDDIHEURIADAU:** Y Cynghorwyr William Thomas Hughes, Carwyn Jones, Dafydd Rhys Thomas.
Mr. Keith Roberts (Yr Eglwys Gatholig).
Mr. Gerallt Ll. Jones (Rheolwr-gyfarwyddwr – Menter Môn).
- HEFYD YN BRESENNOL:** Arweinydd y Cyngor (Eitem 4)
Deilydd Portffolio (Gwasanaethau Cymdeithasol a Thai)
Deilydd Portffolio Cysgodol (Gwasanaethau Cymdeithasol a Thai)
Uwch Reolwr Partneriaeth (Gwynedd a Môn) (AD) (Eitem 4)
Ms. Vicky Poole – Cyfarwyddwr Rhanbarthol – Gogledd Cymru (AGGCC) (Eitem 5)
Mr. Mark Roberts – AGGCC (Eitem 5)

1 YMDDIHEURIADAU

Nodwyd yr ymddiheuriadau fel uchod.

2 DATGANIAD O DDIDDORDEB

Datganodd y Cyngor Ann Griffith ddiddordeb personol yng nghyswllt Eitem 6.

3 COFNODION

Cadarnhawyd fel rhai cywir gofnodion y cyfarfod a gynhaliwyd ar 27 Tachwedd 2014.

4 TREFNIADAU SGRIWTINI Y BWRDD GWASANAETH LLEOL AR Y CYD ARFAETHEDIG

Cyflwynwyd – adroddiad ar y cyd gan yr Uwch Reolydd Partneriaethau, Gwynedd a Môn, Rheolwr Gwasanaethau Democrataidd, Cyngor Gwynedd a'r Swyddog Sgrwtini mewn perthynas â'r uchod.

Dywedodd y Swyddog Sgrwtini bod adroddiad ar y cyd wedi'i gyhoeddi gan Lywodraeth Cynulliad Cymru a CfPS yn 2010 o'r enw 'Sgrwtineiddio Partneriaethau Aml-Asiantaethol' yn amlinellu rhai o'r gwersi a ddysgwyd o'r broses o ddatblygu trefniadau sgrwtini Byrddau Gwasanaeth Lleol ac roeddent yn nodi rhai pwyntiau pwysig i'w cadw mewn cof pan yn datblygu trefniadau. Roedd y rhain wedi'u hamlinellu yn yr adroddiad.

Er mwyn bod mewn sefyllfa i gynghori aelodau ar yr opsiynau posibl ar gyfer sgrwtineiddio Bwrdd Gwasanaeth Lleol Gwynedd a Môn, roedd Grŵp Prosiect Tasg a Gorffen Aml-Asiantaethol wedi ei sefydlu. Roedd yr aelodau'n cynnwys cynrychiolwyr o Fwrdd Iechyd Prifysgol Betsi Cadwaladr, Gwasanaeth Tân ac Achub Gogledd Cymru, Heddlu Gogledd Cymru, Parc Cenedlaethol Eryri a Swyddogion Sgrwtini o'r ddau Gyngor. Er mwyn cael agwedd annibynnol fe wahoddwyd y Ganolfan ar gyfer Sgrwtini Cyhoeddus i wneud sylwadau ynglŷn â'r ystod o opsiynau y gellir eu hystyried gan aelodau etholedig y ddau Awdurdod Lleol. Roedd y Grŵp Tasg a Gorffen hefyd wedi ceisio sicrhau safbwyntiau Medrwn Môn a Mantell Gwynedd fel sefydliadau ambarél oedd yn cynrychioli diddordebau'r trydydd sector. Yng ngoleuni ei drafodaethau, roedd Grŵp Tasg a Gorffen Aml-Asiantaethol y Ganolfan ar gyfer Sgrwtini Cyhoeddus yn cynnig bod tri opsiwn i'r Aelodau Etholedig eu hystyried sef :-

Opsiwn A – Cadw trefniadau'r Pwyllgorau Sgrwtini yng Nghyngor Sir Ynys Môn a Chyngor Gwynedd fel y maent ar hyn o bryd.

Opsiwn B – Sefydlu Panel Sgrwtini ar y cyd ar gyfer Bwrdd Gwasanaeth Lleol Gwynedd a Môn.

Opsiwn C – Sefydlu Pwyllgor Sgrwtini ar y cyd ar gyfer Bwrdd Gwasanaeth Lleol Gwynedd a Môn.

Er bod i bob opsiwn ei fanteision a'i anfanteision ei hun, roedd y Grŵp Tasg a Gorffen Aml-Asiantaethol yn unfrydol y dylid cynnig Opsiwn B fel yr opsiwn a ffefrir i'w ystyried gan Aelodau Etholedig Cyngor Gwynedd a Chyngor Sir Ynys Môn.

Gan ddibynnu ar ba opsiwn a gâi gefnogaeth gan Aelodau Etholedig y ddau Gyngor, y cam nesaf fyddai i'r Grŵp Tasg a Gorffen Aml-Asiantaethol ail-ymgynnull er mwyn ystyried trefniadau ymarferol fel aelodaeth y fforwm sgrwtini ar y cyd, ei weithrediad a threfniadau hyfforddi, trefn y cyfarfodydd a lleoliad ac ati. Byddai'r Ganolfan ar gyfer Sgrwtini Cyhoeddus yn parhau i gynnig cefnogaeth a mentora.

Dywedodd y Swyddogion y byddai angen enwebu 3 Aelod o'r Pwyllgor Sgrwtini Partneriaeth ac Adfywio ar Banel Sgrwtini'r Bwrdd Gwasanaeth Lleol.

Materion a godwyd gan yr Aelodau :-

- Roedd yr Aelodau yn cefnogi Opsiwn B sef sefydlu Panel Sgrwtini ar y cyd ar gyfer BGLI Gwynedd a Môn gyda'r aelodaeth oedd wedi ei nodi yn Atodiad 2. Fodd bynnag, roeddid hefyd yn ystyried y dylai diddordebau Lleisiau Cymunedol Gwynedd a Môn gael eu cynrychioli ar y Panel. Dywedodd y Swyddogion eu bod yn credu y byddai'r gynrychiolaeth o'r trydydd sector ar y Panel arfaethedig yn datrys y mater hwnnw.

- Gofynnwyd cwestiynau ynglŷn â phwy fyddai'n gweinyddu'r Panel Sgrwtini BGLI. Dywedodd y Swyddogion y byddai angen trafod y mater yn y cyfarfod cyntaf o'r Panel Sgrwtini BGLI.

- Cafwyd trafodaeth ymysg yr Aelodau ynglŷn ag enwebu Aelod Etholedig fel dirprwy ar y Panel Sgrwtini BGLI.

Dywedodd y Swyddogion y byddai'r adroddiad hwn yn cael ei ystyried gan Bwyllgor Sgrwtini Corfforaethol Cyngor Gwynedd yn y cyfarfod a gynhelir ar 15 Ionawr 2015.

PENDERFYNWYD :-

- **Bwrw ymlaen gydag Opsiwn B – sefydlu Panel Sgrwtini ar y cyd ar gyfer Bwrdd Gwasanaethau Lleol Gwynedd a Môn a gofyn i'r Swyddogion symud ymlaen i wneud y trefniadau ymarferol, trefn y cyfarfodydd a'r lleoliad.**

- **Enwebu'r Aelodau canlynol fel cynrychiolwyr Cyngor Sir Ynys Môn ar Banel Sgrwtini'r Bwrdd Gwasanaeth Lleol :-**

**Cadeirydd ac Is-Gadeirydd y Pwyllgor Partneriaeth ac Adfywio Y Cynghorydd
John Griffith
Y Cynghorydd Dylan Rees - Dirprwy**

GWEITHREDU: Adroddiad diweddar i'w gyflwyno i gyfarfod o'r Pwyllgor Sgrwtini hwn yn y dyfodol.

5 FFRAMWAITH ADRODD BLYNYDDOL Y CYNGOR (ARCF) ADOLYGIAD A GWERTHUSIAD ARCHWILIAD GWASANAETHAU CYMDEITHASOL AWDURDOD LLEOL

Rhoddodd y Cadeirydd groeso i Ms. Vicky Poole, Cyfarwyddwr Rhanbarthol (Gogledd Cymru) AGGCC a Mr. Mark Roberts o AGGCC i'r cyfarfod.

Cyflwynwyd – Adroddiad gan y Cyfarwyddwr Corfforaethol (Cymuned) mewn perthynas â'r uchod.

Dywedodd y Cyfarwyddwr Corfforaethol (Cymuned) bod Fframwaith Adrodd Blynyddol y Cyngor yn fframwaith a gytunwyd arno yng Nghymru er mwyn gwerthuso, mewn dull cyhoeddus tryloyw, berfformiad y swyddogaethau Gwasanaethau Cymdeithasol ym mhob Awdurdod Lleol. Roedd y llythyr yn cydnabod y cynnydd a wnaed gan yr Awdurdod tra'n amlygu'r angen i gynnal yr ymrwymiad a'r cynnydd gyda'r newidiadau oedd eu hangen. Roedd AGCC yn cyfeirio at y risgiau tebygol parhaol a nodwyd gan yr Arolygiaeth.

Gwneir cyfeiriad penodol at faterion capasiti a'r her i awdurdod bychan wrth geisio rhoi sylw i faint y newid sydd ei angen wrth drawsnewid gwasanaethau gofal cymdeithasol. Mae gwelliannau perfformiad wedi'u gweld yn y Gwasanaethau Plant ond mae risgiau'n parhau o ystyried pa mor amhrofiadol yw'r gweithlu a'r strwythur rheoli. Roedd y llythyr hefyd yn nodi nad oes ond ychydig iawn o gyfeiriad at y camau sydd eu hangen gan yr Awdurdod mewn paratoad ar gyfer gweithredu Deddf Gwasanaethau Cymdeithasol a Llesiant (Ebrill 2016). Mewn ymateb, dywedir bod hyn yn ffurfio rhan o raglen weithredu genedlaethol a bod yr awdurdod wedi ymgysylltu'n briodol yn y rhaglen honno. Yn ychwanegol at hyn, mae'r rhaglen waith a fabwysiadwyd gan y Cyngor a'r Gwasanaeth yn un sy'n cydfynd â dyheadau ac egwyddorion y Ddeddf. Roedd y llythyr yn cydnabod y pwysau ariannol a'r heriau a wynebir gan y Cyngor wrth gwrdd â'i gyfrifoldebau o ran darparu gwasanaeth a chynllunio statudol ar gyfer y Gwasanaethau Cymdeithasol. Mae hyn yn gofyn am roi ffocws parhaol ar ddarparu gwasanaethau diogel ac effeithiol tra'n bwrw ymlaen â'r rhaglen newid sydd ei hangen ac sy'n codi o'r rhaglen drawsnewid. Roedd y camau oedd yn codi o'r llythyr wedi'u hymgorffori o fewn y prosesau busnes a rhaglenni blaenoriaethol o fewn Rhaglen Drawsnewid y Cyngor a chynlluniau busnes y gwasanaethau unigol.

Dywedodd y Cyfarwyddwr Corfforaethol ei bod yn credu bod yr hyfforddiant mewn materion Gwasanaethau Cymdeithasol yn benodol i Aelodau newydd ac i Aelodau cyfredol yn hanfodol i amlygu blaenoriaethau a phwysau ar y Gwasanaethau Cymdeithasol. Roedd yn credu bod y seminar i Aelodau Etholedig yng nghyswllt Cartrefi Preswyl yn un hynod o werthfawr.

Dywedodd Mr. Mark Roberts (AGGCC) bod yr Adroddiad Gwerthuso Adroddiad ar gyfer 2013/14 ynghlwm wrth adroddiad y Cyfarwyddwr Corfforaethol. Nododd bod y Cyngor Sir yn y cyfnod cynnar o weithredu rhaglen drawsnewid uchelgeisiol i'r gwasanaethau oedolion a phlant. Mae'r rhain yn rhaglenni datblygu a newid arwyddocaol i Gyngor bychan ac y mae cyflymder y newid yn cael ei lesteirio gan ddiffyg capasiti. Ar yr un pryd, mae Cyngor newydd wedi ei ethol ac yr oedd trydedd ran ohonynt yn Aelodau a benodwyd o'r newydd. Mae hyn hefyd wedi cael effaith ar gyflymder y newid oherwydd y bu'n bwysig i swyddogion fuddsoddi amser yn sicrhau bod Aelodau Etholedig yn deall y rhaglen drawsnewid yn iawn. Er y cyfyngiadau hyn, mae yna dystiolaeth o gynnydd graddol wedi ei sylfaenu ar gefnogaeth wleidyddol yn arbennig mewn perthynas â'r gwasanaethau i oedolion hŷn. Roedd perfformiad wedi gwella mewn meysydd craidd, yn bennaf mewn perthynas â'r Gwasanaethau Plant er bod diffyg profiad cymharol y gweithlu o fewn y Gwasanaethau Plant yn golygu bod risgiau'n parhau a bod angen parhau i fod yn wyladwrus. Yn y Gwasanaethau Oedolion, roedd y ffocws a roddwyd ar y gwasanaethau i bobl hŷn wedi golygu diffyg ffocws ar wasanaethau i oedolion ieuengach yn cynnwys pobl ag anableddau corfforol, anableddau dysgu ac anghenion iechyd meddwl. Bu'r Cyngor yn agored ynglŷn â'r hyn y mae wedi ei gyflawni gan gydnabod ble y mae ar ei hôl hi gyda'r rhaglen. Mae llawer ar ôl i'w wneud; mae adroddiad y Pennaeth Gwasanaeth yn dwyn sylw at 50 o flaenoriaethau i'w gweithredu yn y Gwasanaethau Oedolion a 23 yn y Gwasanaethau Plant yn ystod 2014/15.

Er bod Rhaglen Drawsnewid y Cyngor yn cyfateb i fwriadau Deddf Gwasanaethau Cymdeithasol a Llesiant (Cymru), ychydig iawn o gyfeiriadau a geir at y Ddeddf yn adroddiad y Cyfarwyddwr. Tra bod adroddiadau manylach y Pennaeth Gwasanaeth yn amlinellu'r datblygiad mewn meysydd yn unol â gofynion y Ddeddf, nid yw'r cysylltiadau hyn yn glir iawn. Mae gan y Cyngor lwyfan cryf i adeiladu arno mewn perthynas ag integreiddio gwasanaethau gyda'r Bwrdd Iechyd yn dilyn datblygu Model Môn dros nifer o flynyddoedd. Mae hyn wedi eu galluogi i sefydlu Bwrdd Darparu Integredig mewn Partneriaeth â Bwrdd Iechyd Prifysgol Betsi Cadwaladr ac sydd yn cael ei ddefnyddio fel peilot ar gyfer y rhanbarth cyfan yng nghyd-destun Datganiad o Fwriad Gogledd Cymru ar gyfer Integreiddio sef darparu gofal cymdeithasol ac iechyd integredig i bobl hŷn ag anghenion cymhleth.

Roedd yr adroddiad yn amlygu'r ymateb i feysydd gwella'r flwyddyn ddiwethaf mewn manylder a meysydd i'w dilyn i fyny gan AGGCC yn y flwyddyn i ddod.

Y prif faterion a godwyd gan yr Aelodau :-

- Codwyd pryderon ynghylch y meysydd ar gyfer eu gwella yn adroddiad AGGCC h.y. Adolygu proses cymhwyso trothwyon DoLS. Dywedodd Mr. Mark Roberts AGGCC bod meysydd o welliant wedi eu nodi a bod angen codi ymwybyddiaeth a gwella arferion mewn perthynas â DoLS. Mae angen hefyd datblygu fframwaith fonitro ansawdd ar draws y Gwasanaethau Plant ac Oedolion.
- Roedd y Deilydd Portffolio Cysgodol yn ystyried ei fod yn flaenoriaeth cynnwys oedolion ifanc bregus gyda phroblemau iechyd meddwl neu anawsterau dysgu ar y rhestr o sgritini yn y dyfodol agos. Nododd ymhellach nad oedd Deddf Gwasanaethau Cymdeithasol a Llesiant yn ddigon gweladwy i'r dinesydd a holodd sut y bydd yr Adran Gwasanaethau Cymdeithasol yn delio â'r mater. Dywedodd y Cyfarwyddwr Corfforaethol (Cymuned) y bydd y Gwasanaeth yn canolbwyntio ar oedolion ifanc bregus. Cyfeiriodd ymhellach at y mater a godwyd yng nghyswllt y Ddeddf Llesiant a nododd ei bod fel Cyfarwyddwr Corfforaethol yn ystyried nad oedd hwn yn fater cynhennus o fewn adroddiad 2013/14 AGGCC.
- Gofynnwyd cwestiynau ynglŷn â'r toriadau tebygol mewn cyllid i'r Sector Gwirfoddol a'r effaith ar wasanaethau i'r preswylwyr lleol. Dywedodd y Cyfarwyddwr Corfforaethol (Cymuned) bod gohebiaeth wedi'i hanfon i'r trydydd sector ar oblygiadau'r toriadau 5% mewn cyllid a gofynnwyd iddynt ymateb i'r Cyngor Sir erbyn yr wythnos nesaf i nodi pa effaith y byddai'r toriadau yn eu cael ar y gwasanaethau y maent yn eu darparu.
- Cafwyd sylwadau ynghylch pobl oedrannus yn gofyn am gefnogaeth gan y Gwasanaethau Cymdeithasol oherwydd unigrwydd. Dywedodd y Cyfarwyddwr Corfforaethol (Cymuned) bod Heneiddio'n Dda yn trefnu gweithgareddau i'r oedrannus a nododd ymhellach ei bod hi a'r Pennaeth Gwasanaethau Oedolion yn mynd i drafod y mater hwn yn y dyfodol agos.

PENDERFYNWYD derbyn yr adroddiad a'r sylwadau a nodwyd uchod.

6 **DIOGELWCH CORFFORAETHOL (PLANT)**

Cyflwynwyd – adroddiad gan Bennaeth y Gwasanaethau Plant mewn perthynas â'r uchod.

Cafwyd adroddiad gan Bennaeth y Gwasanaethau Plant yn dweud bod angen i'r Awdurdod Lleol gynnal hunanwerthusiad yn flynyddol o'i drefniadau i ddiogelu plant ac i adrodd yn ôl ar ei ganfyddiadau i'r Bwrdd Diogelu Rhanbarthol. Roedd Atodiad 1 yn cynnwys yr adroddiad hwnnw. Roedd yr adroddiad yn nodi'r amcanion cytunedig, y cynnydd a wnaed yn erbyn yr amcanion hyn a meysydd pellach oedd angen sylw. Roedd yr adroddiad yn cynnwys dadansoddiad o gyfraniad yr Awdurdod at y cyd-destun aml-asiantaethol ac at waith y Bwrdd Diogelu Plant Rhanbarthol, y Grŵp Cyflawni Lleol ac Is-Grwpiau Rhanbarthol cysylltiedig. Roedd Pennaeth y Gwasanaethau Plant yn dymuno iddo gael ei gofnodi bod Bwrdd Diogelu Rhanbarthol Gogledd Cymru wedi trafod yr adroddiad yn ei gyfarfod oedd wedi ei gynnal yn gynharach heddiw. Roedd y Bwrdd yn croesawu'r adroddiad a bydd yn ystyried yr argymhellion ynddo.

Roedd yr Awdurdod wedi cyflawni gwelliannau yn y Gwasanaethau Plant ac yn y Gwasanaethau Addysg, ac ar hyn o bryd, mae'n symud i gyfnod o ddatblygu a gwella trefniadau diogelu yn gyffredinol. Mae gan y Cyngor Sir Fwrdd Diogelu Corfforaethol a'i rôl yw sicrhau bod dyletswyddau allweddol yr Awdurdod Lleol mewn perthynas â diogelu plant ac oedolion bregus yn cael eu cyflawni'n ddigonol. Mae polisi'r Awdurdod Lleol ar ddiogelu a'r cynllun gweithredu cysylltiedig wedi eu mabwysiadu. Er y cafwyd oedi o ran y cynnydd ar y Cynllun Gweithredu yn erbyn y dyddiadau targed gwreiddiol, mae rhai camau allweddol wedi'u cyflawni. Roedd y camau allweddol wedi'u rhestru yn yr adroddiad i'r Pwyllgor.

Adroddodd y Pennaeth Gwasanaeth ymhellach bod nifer o drefniadau yn eu lle i sicrhau bod gan y sefydliad wasanaethau ar gyfer cyflawni ei ddyletswyddau diogelu – gwerthusiad blynyddol o bob ysgol gan ddefnyddio cerdyn adrodd diogelu safonol ac ar lefel Gwasanaethau Plant, ceir adroddiad yn ôl ar y dangosyddion perfformiad statudol. Mae angen i hyn gael ei ymestyn ar sail gorfforaethol. Felly, ar gyfer 2015/16, bydd pob Pennaeth Gwasanaeth yn gosod amcanion a mesurau diogelu ac, yn ogystal, byddir yn sefydlu Cerdyn Sgorio Diogelu Corfforaethol. Bydd cyflawni amcanion y polisi a'r Cynllun Gweithredu Diogelu o gymorth i gyflwyno sgriwtini mwy effeithiol o ran materion diogelu.

Y prif faterion a godwyd gan Aelodau :-

- Dywedodd y Deilydd Cysgodol ei bod yn falch o ddeall bod y Cyngor Sir ar flaen y gad gyda'r Gwasanaeth Integredig Cymorth i Deuluoedd. Dywedodd y byddai sesiwn briffio fer i Aelodau Etholedig o fudd.
- Holwyd cwestiynau ynglŷn â throsiant staff o fewn yr Adran Gwasanaethau Cymdeithasol ac yn arbennig yn y Gwasanaethau Plant. Dywedodd y Pennaeth Gwasanaethau Plant bod trosiant y staff yn y gwasanaeth wedi sefydlogi dros y flwyddyn ddiwethaf (13/14).

PENDERFYNWYD :-

- **Bod y Pwyllgor hwn yn nodi'r trefniadau corfforaethol i weithredu ei Bolisi Diogelu.**
- **Bod y Pwyllgor yn nodi casgliad yr hunan-arfarniad a gyflwynwyd i'r Bwrdd Diogelu Rhanbarthol a'r camau y bwriedir eu cymryd.**
- **Bod y Pwyllgor yn nodi sefydlu'r Bwrdd Diogelu Corfforaethol.**
- **Bod y Pwyllgor yn sgrwtineiddio'r trefniadau diogelu corfforaethol yn flynyddol.**
 - **Bod y Pwyllgor yn nodi bod yr Awdurdod yn disgwyl am adroddiad terfynol adolygiad Swyddfa Archwilio Cymru o drefniadau sicrwydd ac atebolrwydd y Cyngor i sicrhau bod polisïau a gweithdrefnau diogelu yn eu lle a'u bod yn cael eu dilyn.**

7 DIWEDDARIAD GAN Y CADEIRYDD NEU IS-GADEIRYDD

Dywedodd y Cadeirydd bod Fforwm Sgrwtini Agored gyda Chadeiryddion ac Is-Gadeiryddion Sgrwtini wedi ei gynnal ar 18 Rhagfyr 2014. Roedd dau o'r Cynghorau Cymuned wedi mynegi pa mor bwysig oedd bod y Cyngor yn cyfathrebu'n well gyda Chynghorau Tref a Chymuned. Y pryder a leisiwyd oedd nad oedd Cynghorau Tref a Chymuned bob amser yn gwybod beth oedd rhai o'r penderfyniadau oedd i'w cymryd gan y Pwyllgor Gwaith.

8 RHAGLEN WAITH

Cyflwynwyd y Rhaglen Waith ddrafft.

Dywedodd y Swyddog Sgrwtini bod cais wedi ei wneud i'r eitemau canlynol gael eu cynnwys ar Raglen Waith y Pwyllgor ar gyfer y cyfarfod nesaf :-

Diogelwch Cymunedol

Uwchraddio'r briffordd i Wylfa Newydd – Contract y Cyngor Sir a Horizon UK.

PENDERFYNWYD nodi'r Rhaglen Waith ddrafft a chymeradwyo'r ddwy eitem ychwanegol ar Raglen y cyfarfod nesaf.

Daeth y cyfarfod i ben am 4.00 o'r gloch

**CYNGHORYDD D R HUGHES
CADEIRYDD**